

四庫全書薈要

• 乾隆御覽本

集部

欽定四庫全書薈要

集部

御選古文淵鑒卷二十一

御選古文淵鑒卷二十一目錄

三國

魏文帝

禁母后干政詔

鵜鵠集靈芝池詔

輕刑詔

明帝



正嗣統詔

論封禪詔

郎吏分受四經三禮詔

陳王植

求存問親戚疏

陳審舉疏

魯孔子廟之碑

董昭

陳末流之弊疏

王朗

節省奏

劉廙

論治道表

衛覲

諫明帝疏

楊阜

諫明帝營作宮室疏

高堂隆

諫興役疏

蔣濟

中書專任疏

杜恕

諫考課疏

諫用廉昭疏

程曉

白罷校事疏

夏侯太初

官才議

除重官議

改服制議

御選古文淵鑒卷二十一目錄

御選古文淵鑒卷二十一

內閣學士兼禮部侍郎教習庶吉士臣徐乾學等奉

旨編注

三國

炎漢失馭天下三分曹操拔天子據中原自稱魏王傳子丕受禪孫稚承父兄之基保江東

稱吳蜀先主劉備跨有梁益承漢統出入百載注記分錯晉治書侍郎史陳壽撰三國志

魏文帝

諱丕字子桓武帝太子嗣丞相魏王受漢禪稱帝

禁母后干政詔

黃初三年

夫婦人與政亂之本也自今以後羣臣不得奏事太后
后族之家不得當輔政之任又不得橫受茅土之爵以
此詔傳後世若有背違天下共誅之

鵜鵙集靈芝池詔

黃初四年夏五月有鵜鵙鳥集靈芝池下詔

此詩人所謂汙澤也

曹風侯人篇維鵜在梁鵜汙澤鳥也鵜在梁喻小人在朝

曹詩

刺共公遠君子而近小人今豈有賢智之士處於下位
者乎否則斯鳥何為而至其博舉天下雋德茂才獨行
君子以答曹人之刺

輕刑詔

黃初五年

近之不綏何遠之懷今事多而民少上下相弊以文法
百姓無所措其手足昔太山之哭者以為苛政甚於猛
虎

事見檀弓

我備儒者之風服聖人之遺教豈可以目翫其

辭行違其戒者哉廣議輕刑以惠百姓

明帝

諱叡字元仲
文帝太子

正嗣統詔

禮皇后無嗣擇建支子以繼大宗則當纂正統而奉公

義何得復顧私親哉漢宣繼昭帝後加悼考以皇號

漢宣

武帝曾孫昭帝武帝少子悼考宣帝父史皇孫也宣帝既後昭帝不當考史皇孫

哀帝以外藩

援立而董宏等稱引亡秦或誤時朝

或惑

既尊恭皇立

廟京都又寵藩妾使比長信

哀帝定陶恭王子為成帝後藩妾定陶傅太后及丁

姬也長信宮名皇太后所居帝以高昌侯董宏言尊丁傅如長信宮

叙昭穆於前殿並四

位於東宮僭差無度人神弗祐而非罪師丹忠正之諫

哀帝上丁傅尊號師丹諫不聽免為庶人

用致丁傅焚如之禍

王莽發傅太后冢壓殺數

百人開丁姬梓戶火出炎炎燒梓中器物

自是之後相踵行之昔魯文逆祀

罪繇夏父宋國非度譏在華元

左傳文二年躋僖公送祀也於是夏弗忘為宗

伯成二年宋文公卒厚葬君子謂華元棄君於惡

其令公卿有司深以前世行

事為戒後嗣萬一有繇諸侯入奉大統則當明為人後之義敢為佞邪導諛時君妄建非正之號以干正統謂考為皇稱妣為后則股肱大臣誅之無赦其書之金策藏之宗廟著於令典

論封禪詔

太和中護軍蔣濟請封禪明帝下詔拒之事遂寢

聞蔣濟斯言使我汗出流足自開闢以來封禪者七十

餘君耳

管子古封禪者七十二家

故太史公曰雖有受命之君而功

化不洽是以中間廣遠者千有餘年近者數百歲其儀

闕不可得記我何德之修敢庶茲乎濟豈謂世無管仲

以吾有桓公登泰山之志乎

桓公欲封禪以管子言而止

吾不欺天

也濟之所言華則榮矣非助我者也公卿侍中尚書常侍省之而已勿有所議亦不須答詔也

郎吏分受四經三禮詔

景初中帝以高堂隆及蘇林秦靜等並老恐無

能傳業者下詔

昔先聖既沒而其遺言遺教著於六藝六藝之文禮又

為急弗可斯須離者也末俗背本所由來久故閔子譏

原伯之不學

左傳昭十八年周原伯魯不說學閔子騫曰周其亂乎

荀卿醜秦世

之坑儒

始皇三十五年坑諸生四百六十餘人

儒學既廢則風化曷由興

哉方今宿生巨儒並各年高教訓之道孰為其繼昔伏

生將老漢文帝嗣以鼂錯

伏生治尚書年九十餘不能行文帝詔鼂錯往受之穀

梁寡儔宣帝承以十郎

蔡千秋能為穀梁上愍其學且絕選郎十人從受

其科

郎吏高才解經義者三十人從光祿勳隆散騎常侍林

博士靜分受四經三禮主者具為設課試之法夏侯勝
漢宣帝時太子太傅有言士病不明經術經術苟明其取青紫如
俯拾地芥耳今學者有能究極經道則爵祿榮寵不期
而至可不勉哉

陳王植

植字子建武帝子特見寵愛幾為太子初封平原侯徙臨淄文帝即位謁者灌均希

旨奏植貶爵安鄉侯改封甄城進爵為王徙雍丘再徙東阿後封陳王

求存問親戚疏

時法制待藩國峻迫太和五年植上疏

臣聞天稱其高者以無不覆地稱其廣者以無不載日

月稱其明者以無不照江海稱其大者以無不容故孔
子曰大哉堯之為君惟天為大惟堯則之夫天德之於
萬物可謂弘廣矣蓋堯之為教先親後疏自近及遠其
傳曰克明峻德以親九族九族既睦平章百姓及周之
文王亦宗厥化其詩曰刑於寡妻至於兄弟以御於家
邦是以雍雍穆穆風人詠之

周頌雍之篇有來雍
雍又曰天子穆穆

昔周

公弔管蔡之不咸廣封懿親以藩屏王室傳曰周之宗

盟異姓為後誠骨肉之恩爽而不離

爽差也言雖差
舛不至離隔

親

親之義實在敦固未有義而後其君仁而遺其親者也

伏惟陛下資帝唐欽明之德體文王翼翼之仁惠洽椒

房

大雅大明篇惟此文王小
心翼翼漢書皇后稱椒房

恩昭九族羣后百寮番休

遞上

衆臣百官宿衛以
次休息遞為上下

執政不廢於公朝下情得展於

私室親理之路通慶弔之情展誠可謂恕已治人推惠

施恩者矣至於臣者人道絕緒禁錮明時臣竊自傷也

不敢過望交氣類

氣類
僚友

修人事叙人倫近且婚媾不通

兄弟乖絕吉凶之間塞慶弔之禮廢恩紀之違甚於路

人隔閼之異殊於胡越令臣以一切之制永無朝覲之望至於注心皇極結情紫闥神明知之矣然天實為之謂之何哉退惟諸王常有戚戚具爾之心

大雅行葦篇戚戚兄弟莫

遠具

願陛下沛然垂詔使諸國慶問四節得展以叙骨

肉之歡恩全怡怡之篤義妃妾之家膏沐之遺歲得再通齊義於貴宗等惠於百司如此則古人之所歎風雅之所詠復存於聖世矣臣伏自惟省無錐刀之用及觀陛下之所拔授若以臣為異姓竊自料度不後於朝士

矣若得辭遠遊戴武弁

後漢書與服志遠遊冠諸侯所服也武冠一曰五弁大冠諸武

官服

解朱組佩青紱

與服志諸侯王赤紱九卿中二千石二千石青紱

駙馬奉

車趣得一號

漢書駙馬都尉掌駙馬奉車都尉掌御乘輿車駙副馬也非正駕車皆為駙馬安

宅京室執鞭珥筆出從華蓋入侍輦轂承答聖問拾遺

左右乃臣丹誠之至願不離於夢想者也遠慕鹿鳴君

臣之宴中詠常棣匪他之誠下思伐木友生之義終懷

蓼莪罔極之哀

鹿鳴燕羣臣嘉賓也常棣燕兄弟也伐木燕朋友故舊也蓼莪孝子不得終養

也四詩皆小雅篇名也

每四節之會塊然獨處左右惟僕隸所對

惟妻子高談無所與陳發義無所與展未嘗不聞樂而

拊心臨觴而歎息也

漢武帝建元三年諸王來朝天子置酒中山靖王勝聞樂而泣具以

為吏所侵聞

臣伏以為犬馬之誠不能動人譬人之誠不能

動天崩城隕霜

崩城祀梁妻事隕霜鄒衍事

臣初信之以臣心況徒

虛語耳若葵藿之傾葉太陽雖不為之回光然向之者

誠也竊自比於葵藿若降天地之施垂三光之明者實

在陛下臣聞文子曰不為福始不為禍先今之否隔友

于同憂而臣獨倡言者竊不願於聖世使有不蒙施之

物有不蒙施之物必有慘毒之懷故栢舟有天只之怨

谷風有棄子之歎

栢舟 鄘風篇
谷風 小雅篇

故伊尹恥其君不為堯

舜孟子曰不以舜之所以事堯事其君者不敬其君者
也臣之愚蔽固非虞伊至於欲使陛下宗光被時雍之

美宣緝熙章明之德者是臣悽悽之誠竊所獨守寔懷

鶴立企佇之心敢復陳聞者冀陛下儻發天聰而垂神

聽也

帝詔報曰矯枉過正下吏懼
聽也至此耳已動有司如王所訴

陳審舉疏

臣聞天地協氣而萬物生君臣合德而庶政成五帝之
世非皆智三季之末非皆愚用與不用知與不知也既
時有舉賢之名而無得賢之實必各援其類而進矣諺
曰相門有相將門有將夫相者文德昭者也將者武功
烈者也文德昭則可以匡國朝致雍熙稷契變龍是也
武功烈則可以征不庭威四夷南仲方叔是也昔伊尹
之為媵臣至賤也呂尚之處屠釣至陋也及其見舉于
湯武周文誠道合志同玄謨神通豈復假近習之薦因

左右之介哉書曰有不世之君必能用不世之臣用不
世之臣必能立不世之功殷周二王是已若夫齷齪近步
遵常守故安足為陛下言哉故陰陽不和三光不暢官
曠無人庶政不整者三司之責也疆場騷動方隅內侵
沒軍喪衆干戈不息者邊將之憂也豈可虛荷國寵而
不稱其任哉故任益隆者負益重位益高者責益深書
稱無曠庶官詩有職思其憂此其義也陛下體天真之
淑聖登神機以繼統冀間康哉之謌偃武行文之美而

數年以來水旱不時民困衣食師徒之發歲歲增調加東有覆敗之軍西有殪沒之將至使蚌蛤浮翔于淮泗鯉鮪謹諱于林木

指吳蜀二國

臣每念之未嘗不輟食而揮

餐臨觴而搯腕矣昔漢文發代疑朝有變宋昌曰內有朱虛東牟之親外有齊楚淮南瑯琊此則磐石之宗願王勿疑臣伏惟陛下遠覽姬文二虢之援中慮周成召畢之輔下存宋昌磐石之固昔騏驥之于吳阪可謂困矣及其伯樂相之孫郵御之形體不勞而坐取千里蓋

伯樂善御馬明君善御臣伯樂馳千里明君致太平誠
任賢使能之明效也若朝司惟良萬機內理武將行師
方難克弭陛下可得雍容都城何事勞動鑾駕暴露于
邊境哉臣聞羊質虎皮見草則悅見豺則戰忘其皮之
虎也今置將不良有似于此故語曰患為之者不知知
之者不得為也昔樂毅奔趙心不忘燕廉頗在楚思為
趙將臣生于亂長乎軍又數承教于武皇帝伏見行師
用兵之要不必取孫吳而闇與之舍竊揆之于心常願

得一奉朝覲排金門蹈玉陛列有職之臣賜須臾之間
使臣得一散所懷攄舒蘊積死不惜矣被鴻臚所下發
士息書期會甚急又聞豹尾已建戎軒驚駕陛下將復
勞玉躬擾挂神思臣誠竦息不遑寧處願得策馬執鞭
首當塵露撮風后之奇接孫吳之要追慕卜商起予左
右效命先驅畢命輪轂雖無大益冀有小補然天高聽
遠情不上通徒獨望青雲而拊心仰高天而歎息耳屈
平曰國有驥而不知乘焉皇皇而更索昔管蔡放誅周

召作弼叔魚陷刑叔向匡國

叔魚叔向弟左傳昭十四年叔魚鬻獄為邢侯所殺

三監之釁臣自當之二南之輔求必不遠華宗貴族藩王

之中必有應斯舉者故傳曰無周公之親不得行周公

之事唯陛下少留意焉近者漢氏廣建藩王豐則連城

數十約則饗食祖宗而已未若姬周之樹國五等之品

制也若扶蘇之諫始皇淳于越之難周青臣可謂知時

變矣

始皇三十五年阮諸生長子扶蘇諫不聽使扶蘇北監蒙恬于上郡三十四年僕射周青臣進頌曰

陛下以諸侯為郡縣自上古不及陛下成德

博士淳于越曰青臣面諛以重陛下之過

夫能使天

而傾耳注目者當權者是矣故謀能移主威能懾下豪
右執政不在親戚權之所在雖疏必重勢之所去雖親
必輕蓋取齊者田族非呂宗也分晉者趙魏非姬姓也
惟陛下察之苟吉專其位凶離其患者異姓之臣也欲國
之安祈家之貴存共其榮沒同其禍者公族之臣也今
反公族疏而異姓親臣竊惑焉臣聞孟子曰君子窮則
獨善其身達則兼善天下今臣與陛下踐冰履炭登山
浮澗寒溫燥溼高下共之豈得離陛下哉不勝憤懣拜

表陳情若有不合乞且藏之書府不便減棄臣死之後
事或可思若有毫釐少挂聖意者乞出之朝堂使夫博
古之士糾臣表之不合義者如是則臣願足矣

希優文
答報

魯孔子廟之碑

維黃初元年大魏受命循軒轅之高縱

王沈魏書其先
出於黃帝當高

陽世陸終之子
安是為曹姓

紹虞氏之遐統

文帝既受禪謂羣臣曰
舜禹之事吾知之矣

應歷數以改物揚仁風以作教於是輯五瑞班宗彝鈞
衡石同度量秩羣祀於無文順天時以布化既乃緝熙

聖緒昭顯上世追承二代三恪之禮

黃初元年奉漢帝為山陽公行漢正

朔以天子之禮郊祭上書不稱臣

兼紹宣尼褒成之後

漢平帝元始元年封孔子後為

褒成侯追諡孔子為褒成宣尼公

以魯縣百戶命孔子廿一世孫議郎

孔羨為宗聖侯以奉孔子之祀制詔三公曰昔仲尼負

大聖之才懷帝王之器當衰周之末而無受命之運生

乎魯衛之朝教化乎洙泗之上栖栖焉皇皇焉欲屈已

以存道貶身以救世當時三公終莫能用之乃退考五

代之禮修素王之事

孔子未生時有麒麟吐玉書於闕里其文曰水精之子繼周衰而為

素王

因魯史而制春秋就太師而正雅頌俾千載之後莫

不采其文以述作印其聖以成謀咨可謂命世大聖億載之師表者已遭天下大亂百祀墮壞舊居之廟毀而不修褒成之後絕而莫繼闕里不聞講誦之聲四時不睹烝嘗之位斯豈所謂崇化報功盛德百世必祀者哉嗟乎朕甚閔焉其以議郎孔羨為宗聖侯邑百戶奉孔子之祀令魯郡修起舊廟置百石吏卒以守衛之又於其外廣為屋宇以居學者於是魯之父老諸生游士睹

廟堂之始復觀俎豆之初設嘉聖靈於髣髴想禎祥之

來集乃慨然而歎曰大道衰廢禮樂滅絕卅餘年

卅三
十并

也○
音韻

皇上懷仁聖之懿德兼二儀之化育廣大苞於無

方淵深淪於不測故自受命以來天人咸和神氣烟煜

嘉瑞踵武休徵屢臻殊俗解編髮而慕義遐夷越險阻

而來賓雖太皞遊龍以君世虞氏儀鳳以臨民

太皞伏
犧氏有

龍瑞號曰龍師虞
舜作樂鳳凰來儀

伯禹命玄宮而為夏后西伯由岐社

而為周文尚何足稱於大魏哉若乃紹繼微絕興修廢

官疇咨稽古崇配乾坤允神明之所福祚宇內之所歡

欣也豈徒魯邦而已哉爾乃感殷人路寢之義嘉先民

泮宮之事

商頌殷武卒章寢成孔安鄭氏箋高宗復成湯之道改新路寢魯頌泮水頌僖公能修泮

也宮以為高宗僖公蓋嗣世之王諸侯之國耳猶著德於

名頌騰聲乎千載況今聖皇肇造區夏創業垂統受命

之日曾未下輿而褒美大聖隆化如此能無頌乎乃作頌曰

煌煌大魏受命溥將

將大也

并體黃虞含夏苞商降釐下

上上清三光羣祀咸秩靡事不綱嘉彼玄聖有邈其靈

遭世霧亂莫顯其榮褒成既絕寢廟斯傾闕里蕭條靡
歆靡馨我皇悼之尋其世武乃建宗聖以紹厥後修復
舊堂豐其薨宇莘莘學徒爰居爰處王教既備羣小端
沮魯道以興永作憲矩洪聲登假神祇來和休徵雜還
瑞我邦家內光區域外被荒遐殊方重譯搏拊揚歌於
赫四聖運世應期仲尼既沒文亦在茲彬彬我后越而
五之並於億載如山之基

董昭

昭字公仁濟陰定陶人
歷官太僕封樂平侯

陳末流之弊疏

凡有天下者莫不貴尚敦樸忠信之士深疾虛偽不真
之人者以其毀教亂治敗俗傷化也近魏諷則伏誅建
安之末

西曹掾魏諷有惑衆才
傾動鄴都以謀反誅

曹偉則斬戮黃初之始

山陽曹偉素有才名聞吳稱藩以白衣與吳
王交書求賂欲以交結京師黃初二年伏誅

伏惟前後

聖詔深疾浮偽欲以破散邪黨常用切齒而執法之吏
皆畏其威執莫能糾擿毀壞風俗侵欲滋甚竊見當今
年少不復以學問為本專更以交游為業國士不以孝

慄清修為首乃以趨勢游利為先合黨之羣互相褒歎

以毀訾為罰戮用黨譽為爵賞附已者則歎之盈言不
附者則為作瑕釁至乃相謂今世何憂不度邪但求人
道不勤羅之不博耳又何患其不知已矣但當吞之以
藥而柔調耳又聞或有使奴客名作在職家人冒之出
入往來禁輿交通書疏有所探問凡此諸事皆法之所
不取刑之所不赦雖諷偉之罪無以加也

帝於是發切
詔斥免諸葛

誕鄧
騭等

王朗

朗字景興東海郡人司徒封蘭陵侯

節省奏

詔問所宜損益必謂東京之事也若夫西京雲陽汾陰

之大祭

漢書武帝郊見泰一雲陽文帝治廟汾陰欲祠出周鼎

千有五百之羣祀

通天之臺

武帝作通天臺以候神人

入阿房之宮齋必百日養犧五

載牛則三千其重玉則七千其器文綺以飾重席童女

以蹈舞綴釀醑必貫三時而後成樂人必三千四百而

後備內宮美人數至近千學宮博士七千餘人中厩則

駢騶駙馬六萬餘匹外牧則扈養三萬而馬十之執金

吾

掌宮外戒司非常水火之事

從騎六百走卒倍焉太常

掌禮儀祭祀

行

陵幸車千乘太官賜官奴婢六千長安城內治民為政

者三千中二千石蔽罪斷刑者二十有五獄政充事猥

威儀繁富隆於三代近過禮中夫所以極奢者大抵多

受之於秦餘既違繭栗慤誠之本

祭天地之牛角繭栗

掃地簡易

之指

禮記至敬不壇掃地而祭

又失替質而損文避泰而從約之趣

豈夫當今隆興盛明之時祖述堯舜之際割奢務儉之

政除繁從省之令詳刑慎罰之教所宜希慕哉及夫寢廟日一太牢之祀郡國並立宗廟之法丞相御史大夫官屬吏從之數若此之輩既已屢改於哀平之前不行光武之後矣謹按圖謀所改奏在天地及五帝六宗宗廟社稷既已因前代之兆域矣夫天地則掃地而祭其餘則皆壇而埒之矣明堂所以祀上帝靈臺所以觀天文辟雍所以修禮樂太學所以集儒林高禩所以祈休祥又所以察時務揚教化稽古先民開誕慶祚舊時皆

在國之陽並高棟夏屋足以肆饗射望雲物七郊雖尊
祀尚質猶皆有門宇便坐足以避風雨可須軍罷年豐
以漸修治舊時虎賁羽林

俱掌宿衛侍從

五營兵及衛士并合

雖且萬人或商賈墮游子弟或農野謹鈍之人雖有乘
制之處不講戎陣既不簡練又希更寇雖名實不副難
以備急有警而後募兵軍行而後運糧或乃兵既久屯
而不務營佃不修器械無有貯聚一隅馳羽檄則三面
並荒擾此亦漢氏近世之失而不可式者也當今諸夏

已安而巴蜀在畫外雖未得偃武而弢甲放馬而戢兵
宜因年之大豐遂寄軍政於農事吏士小大並勤稼穡
止則成井里於廣野動則成校隊於六軍省其暴繇贍
其衣食易稱悅以使民民忘其勞悅以犯難民忘其死
今之謂矣糧畜於食勇畜於執雖坐曜烈威而衆未動
畫外之蠻必復稽顙以求改往而效用矣若畏威效用
不戰而定則賢於交兵而後威立接刃而後功成遠矣
諸姦凶不革遂迷不反猶欲以其所虐用之民待大魏

投命報養之士然後徐以前歌後舞樂征之衆臨彼倒
戟折矢樂服之羣伐腐摧枯未足以爲喻

劉廙

廙字恭嗣南陽安
衆人侍中關內侯

論治道表

昔者周有亂臣十人有婦人焉九人而已孔子稱其才
難不其然乎明賢者難得也况亂弊之後百姓凋盡士
之存者蓋亦無幾股肱大職及州郡督司邊方重任難
備其官亦未得人也此非選者之不用蓋才匱使之然

耳況於長吏以下羣職小任能皆簡練備得其人也其計莫如督之以法不爾而數轉易往來不已送迎之煩不可勝計轉易之間輒有奸巧既於其事不省而為政者亦以其不得久安之故知惠益不得成於已而苟且之可免於患皆將不念盡心於邨民而夢想於聲譽此非所以為政之本意也今之所以為黜陟者近頗以州郡之毀譽聽往來之浮言耳亦皆得其事實而課其能否也長吏之所以為佳者奉法也憂公也邨民也此三

事者或州郡有所不便往來者有所不安而長吏執之
不已於治雖得計其聲譽未為美闕而從人於治雖失
計其聲譽必集也長吏皆知黜陟之在於此也亦何能
不去本而就末哉以為長吏皆宜使小久足使自展歲
課之能三年總計乃加黜陟課之皆當以事不得依名
事者皆以戶口率其墾田之多少及盜賊發興民之亡
叛者為得負之計如此行之則無能之吏修名無益有
能之人無名無損法之一行雖無部司之監姦譽妄毀

可得而盡

衛覲

字伯儒河東安邑人魏文帝時為尚書封陽吉亭侯明帝即位封閼鄉侯三百戶誼敬侯

諫明帝疏

時百姓凋廢而後務方殷覲乃上疏

夫變情厲性彊所不能人臣言之既不易人主受之又艱難且人之所樂者富貴顯榮也所惡者貧賤死亡也然此四者君上之所制也君愛之則富貴顯榮君惡之則貧賤死亡順指者愛所由來逆意者惡所從至也故人臣皆爭順指而避逆意非破家為國殺身成君者誰

能犯顏色觸忌諱建一言開一說哉陛下留意察之則臣下之情可見矣今議者多好悅耳其言政治則比陛下於堯舜其言征伐則比二虜於狸鼠臣以為不然昔漢文之時諸侯彊大賈誼累息以為至危況今四海之內分而為三羣士陳力各為其主其來降者未肯言舍邪就正咸稱迫於困急是與六國分治無以為異也當今千里無烟遺民困苦陛下不善留意將遂凋弊難可復振禮天子之器必有金玉之飾飲食之肴必有八珍

之味至於凶荒則徹膳降服然則奢儉之節必視世之
豐約也武皇帝之時後宮食不過一肉衣不用錦綉茵
褥不緣飾器物無丹漆用能平定天下遺福子孫此皆
陛下之所親覽也當今之務宜君臣上下並用籌策計
校府庫量入為出深思句踐滋民之術由恐不及而尚
方所造金銀之物漸更增廣工役不輟侈靡日崇帑藏
日竭昔漢武信求神仙之道謂當得雲表之露以餐玉
屑故立仙掌以承高露陛下通明每所非笑漢武有求

於露而由尚見非陛下無求於露而空設之不益於好而糜費工夫誠皆聖慮所宜裁制也

楊阜

字義山天水冀人也太祖時賜爵關內侯征漢中為益州刺史轉武都太守明帝時為城

門校尉遠將作大匠

諫明帝營作宮室疏

帝既新作許宮又營洛陽宮殿觀閣阜上疏奏御手

筆詔答

堯尚茅茨而萬國安其居禹卑宮室而天下樂其業及至殷周或堂崇三尺度以九筵耳古之聖帝明王未有

極宮室之高麗以彫弊百姓之財力者也桀作璇室象
廊紂為傾宮鹿臺以喪其社稷楚靈以築章華而身受
其禍秦始皇作阿房而殃及其子天下叛之二世而滅
夫不度萬民之力以從耳目之欲未有不亡者也陛下
當以堯舜禹湯文武為法則夏桀殷紂楚靈秦皇為深
誠高高在上實監后德慎守天位以承祖考巍巍大業
猶恐失之不風夜敬止允恭卹民而乃自暇自逸惟宮
臺是侈是飾必有顛覆危亡之禍易曰豐其屋蔀其家

闢其戶閔其無人王者以天下為家言豐屋之禍至於
家無人也方今二虜合從謀危宗廟十萬之軍東西奔
赴邊境無一日之娛農夫廢業民有饑色陛下不以是
為憂而營作宮室無有已時使國亡而臣可以獨存臣
又不言也君作元首臣為股肱存亡一體得失同之孝
經曰天子有爭臣七人雖無道不失其天下臣雖驚怯
敢忘爭臣之義言不切至不足以感寤陛下陛下不察
臣言恐皇祖烈考之祚將墜于地使臣身死有補萬一

則死之日猶生之年也謹叩棺沐浴伏候重誅

高堂隆

隆字升平泰山平陽人累官光祿勳

諫興役疏

明帝景初元年增崇宮室百役繁興帝躬自掘土率公卿以下莫不展力

隆上疏切諫

蓋天地之大德曰生聖人之大寶曰位何以守位曰仁
何以聚人曰財然則士民者乃國家之鎮也穀帛者乃
士民之命也穀帛非造化不育非人力不成是以帝耕
以勸農后桑以成服

月令孟春之月天子親載耒耜躬耕帝藉季春之月后妃親東鄉躬

秦以勸蠶事以供郊廟之服

所以昭事上帝告虔報施也昔在伊唐

伊祁氏堯
唐國號

世值陽九厄運之會洪水滔天使鯀治之績

用不成乃舉文命隨山刊木

鯀崇伯文命
史以為禹名

前後歷年二

十二載災眚之甚莫過於彼力役之興莫久於此堯舜

君臣南面而已禹敷九州庶土庸勲各有差等君子小

人物有服章今無若時之急而使公卿大夫並與厮徒

共供事役聞之四夷非嘉聲也垂之竹帛非令名也是

以有國有家者近取諸身遠取諸物嫗煦養育故稱愷

悌君子民之父母

詩大雅
洞酌篇

今上下勞役疾病凶荒耕稼

者寡饑饉薦臻無以卒歲宜加愍卹以救其困臣觀在

昔書籍所載天人之際未有不應也是以古先哲王畏

上天之明命循陰陽之逆順矜矜業業惟恐有違然後

治道用興德與神符災異既發懼而修政未有不延期

流祚者也爰及末葉闇君荒主不崇先王之令軌不納

正士之直言以遂其情志恬忽變戒未有不尋踐禍難

至於顛覆者也

是年天作淫雨冀州水出
漂沒民物故隆疏及之

天道既著請

以人道論之夫六情五性同在於人嗜欲廉貞各居其一及其動也交爭於心欲彊質弱則縱濫不禁精誠不制則放溢無極夫情之所在非好則美而美好之集非人力不成非穀帛不立情苟無極則人不堪其勞物不充其求勞求並至將起禍亂故不割情無以相供仲尼云人無遠慮必有近憂繇此觀之禮義之制非苟拘分將以遠害而興治也今吳蜀二賊非徒白地小鹵

邊地
草多

白聚邑之寇乃據險乘流跨有士衆僭號稱帝欲與中

國爭衡今若有人來告權備並修德政復履清儉輕省
租賦不治玩好動咨者賢事遵禮度陛下聞之豈不惕
然惡其如此以為難卒討滅而為國憂乎若使告者曰
彼二賊並為無道崇侈無度役其士民重其徵賦下不
堪命吁嗟日甚陛下聞之豈不勃然忿其困我無辜之
民而欲速加之誅其次豈不幸彼疲弊而取之不難乎
苟如此則可易心而度事義之數亦不遠矣且秦始皇
不築道德之基而築阿房之宮不憂蕭牆之變而修長

城之役

秦始皇三十四年築長城三十五年作宮阿房

當其君臣為此計也亦

欲立萬世之業使子孫長有天下豈意一朝匹夫大呼

而天下傾覆哉

二世元年七月戌卒陳勝等反故荆地豪傑並起亡秦

故臣以為

使先代之君知其所行必將至於敗則弗為之矣是以

亡國之主自謂不亡然後至於亡賢聖之君自謂將亡

然後至於不亡昔漢文帝稱為賢主躬行約儉惠下養

民而賈誼方之以為天下倒懸可為痛哭者一可為流

涕者二可為長歎息者三況今天下彫弊民無儋石之

儲國無終年之畜外有彊敵六軍暴邊內興土功州郡騷動若有寇警則臣懼版築之士不能投命虜庭矣又將吏奉祿稍見折減方之於昔五分居一諸受休者又絕廩賜不應輸者今皆出半此為官入兼多於舊其所出與參少於昔而應支經用更每不足牛肉小賦前後相繼反而推之凡此諸費必有所在且夫祿賜穀帛人主所以惠養吏民而為之司命者也若今有廢是奪其命矣既得之而又失之此生怨之府也周禮天府掌九

伐之則以給九式之用入有其分出有其所不相干乘

而用各足各足之後乃以式貢之餘供王玩好

大府天官屬周

禮大府凡頒財以式法授之凡式貢之餘以供玩好之用按天府宜作大府凡伐宜作九賦

又上用

財必考於司會

司會天官屬

今陛下所與共坐廊廟治天下

者非三司九列則臺閣近臣皆腹心造膝宜在無諱若

見豐省而不敢以告從命奔走惟恐不勝是則具臣非

鯁輔也昔李斯教秦二世曰為人主而不恣睢命之曰

天下桎梏二世用之秦國以覆斯亦滅族

李斯教二世行督責之術

卒具五刑腰斬是以史遷議其不正諫而為世誡書奏咸陽市夷三族馬謂中書監令曰觀帝覽隆此奏使朕懼哉

蔣濟

字子通楚國平阿人累官太尉

中書專任疏

時中書監令號為專任濟上疏

大臣太重者國危左右太親者身蔽古之至戒也逞者大臣秉事外內扇動陛下卓然自覽萬機莫不祇肅夫大臣非不忠也然威權在下則衆心慢上勢之常也陛下既已察之於大臣願無忘於左右左右忠正遠慮未

必賢於大臣至於便辟取合或能工之今外所言輒云
中書雖使恭慎不敢外交但有此名猶惑世俗况實握
事要日在目前儻因疲倦之間有所割制衆臣見其能
推移於事即亦因時而向之一有此端因當內設自完
以此衆語私招所交為之內援若此臧否毀譽必有所
興功負賞罰必有所易直道而上者或壅曲附左右者
反達因微而入緣形而出意所狎信不復猜覺此宜聖
智所當早聞外以經意則形際自見或恐朝臣畏言不

合而受左右之怨莫適以聞臣竊亮陛下潛神默思公
聽並觀若事有未盡於理而物有未周於用將改曲易
調遠與黃唐角功近昭武文之迹豈近習而已哉然人
君猶不可悉天下事以適已明當有所付三官任一臣
非周公旦之忠又非管夷吾之公則有弄機敗官之弊
當今柱石之士雖少至於行稱一州智效一官忠信竭
命各奉其職可並驅策不使聖明之朝有專吏之名也
詔曰夫骨鯁之臣人主之所仗也濟才兼文武服勤盡
節每軍國大事輒有奏議忠誠奮發吾甚壯之就遷為

護軍將軍加
散騎常侍

杜恕

恕字務伯杜陵人幽
州刺史護烏桓校尉

諫考課疏

時大議考課之制以考內外衆官恕
以為用不盡其人雖才且無益所存

非所務所務非
世要乃上疏

書稱明試以功

益稷篇

三考黜陟

舜典篇

誠帝王之盛制使

有能者當其官有功者受其祿譬猶烏獲之舉千鈞良

樂之選驥足也雖歷六代而考績之法不著關七聖而

課試之文不垂臣誠以為其法可粗依其詳難備舉故

也語曰世有亂人而無亂法若使法可專任則唐虞可

不須稷契之佐殷周無貴伊呂之輔矣今奏考功者陳

周漢之法為綴京房之本旨

京房傳房奏考功課吏法

可謂明考課

之要矣於以崇揖讓之風興濟濟之治臣以為未盡善

也其欲使州郡考士必由四科

一德行二經學
三明法四任事

皆有事

效然後察舉試辟公府

漢制三公
皆得辟舉

為親民長吏轉以功

次補郡守者或就增秩賜爵此最考課之急務也臣以

為便當顯其身用具言使具為課州郡之法法具施行

立必信之賞施必行之罰至於公卿及內職大臣亦當俱以其職考課之也

按亦字當作不

古之三公坐而論道內職

大臣納言補闕無善不紀無過不舉且天下至大萬機至衆誠非一明所能徧照故君為元首臣為股肱明其一體相須而成也是以古人稱廊廟之才非一木之枝帝王之業非一士之畧繇是言之焉有大臣守職辦課可以致雍熙者哉且布衣之交猶有務信誓而蹈水火感知已而披肝膽循聲名而立節義者況於束帶立朝

致位卿相所務者非特匹夫之信所感者非徒知己之
惠所徇者豈聲名而已乎諸蒙寵祿受重任者不徒欲
舉明主於唐虞之上而已身亦欲廁稷契之列是以古
人不患於念治之心不盡患於自任之意不足此誠人
主使之然也唐虞之君委任稷契夔龍而責成功及其
罪也殛鯀而放四凶今大臣親奉明詔給事目下其有
夙夜在公恪勤特立當官不撓貴勢執平不阿所私危
言危行以處朝廷者自明主所察也若尸祿以為高拱

默以為智當官苟在於免負立朝不忘於容身絜行遜
言以處朝廷者亦明主所察也誠使容身保位無放還
之辜而盡節在公抱見疑之勢公義不修而私議成俗
雖仲尼為謀猶不能盡一才又況於世俗之人乎今之
學者師商韓而上法術競以儒家為迂濶不周世用此
最風俗之流弊創業者之所致慎也

後考課
竟不行

諫用廉昭疏

恕太和中為散騎黃門侍郎明帝
任樂安廉昭以伺察羣下恕上此

疏

伏見尚書郎廉昭奏左丞曹璠以罰當關不依詔坐判
問又云諸當坐者別奏尚書令陳矯自奏不敢辭罰亦
不敢以處重為恭意至懇惻臣竊憫然為朝廷惜之夫
聖人不擇世而興不易民而治然而生必有賢智之佐
者蓋進之以道率之以禮故也古之帝王之所以能輔
世長民者莫不遠得百姓之歡心近盡羣臣之智力誠
使今朝任職之臣皆天下之選而不能盡其力不可謂
能使人若非天下之選亦不可謂能官人陛下憂勞萬

機或親燈火而庶事不康刑禁日弛豈非股肱不稱之
明效歟原其所繇非獨臣有不盡忠亦主有不能使百
里奚愚於虞而智於秦豫讓苟容中行而著節智伯斯
則古人之明驗矣今臣言一朝皆不忠是誣一朝也然
其事類可推而得陛下感帑藏之不充實而軍事未息
至乃斷四時之賦衣薄御府之私穀帥繇聖意舉朝稱
明與聞政事密勿大臣寧有懇懇憂此者乎騎都尉王
才幸樂人孟思所為不法振動京都而其罪狀發於小

吏公卿大臣初無一言自陛下踐阼以來司隸校尉御史中丞寧有舉網維以督姦宄使朝廷肅然者耶若陛下以為今世無良才朝廷乏賢佐豈可追望稷契之遐蹤坐待來世之偶又乎今之所謂賢者盡有大官而享厚祿矣然而奉上之節未立向公之心不一者委任之責不專而俗多忌諱故也臣以為忠臣不必親親臣不必忠何者以其居無嫌之地而事得自盡也今有疏者毀人不實其所毀而必曰私報所憎譽人不實其所譽

而必曰私愛所親左右或因之以進憎愛之說非獨毀譽有之政事損益亦皆有嫌陛下當思所以闡廣朝臣之心篤厲有道之節使之自同古人望與竹帛耳反使如廉昭者擾亂其間臣懼大臣遂將容身保位坐觀得失為來世戒也昔周公戒魯侯曰無使大臣怨乎不言賢愚明皆當世用也堯數舜之功稱去四凶不言大小有罪則去也今者朝臣不自以為不能以陛下為不任也不自以為不智以陛下為不問也陛下何不遵

周公之所以用大舜之所以去使侍中尚書坐則侍帷
幄行則從華輦親對詔問所陳必達則羣臣之行能否
皆可得而知忠能者進閤劣者退誰敢依違而不自盡
以陛下之聖明親與羣臣論議政事使羣臣人得自盡
人自以為親人思所以報賢愚能否在陛下之所用以
此治事何事不辦以此建功何功不成每有軍事詔書
常曰誰當憂此者耶吾當自憂耳近詔又曰憂公忘私
者必不然但先公後私即自辨也伏讀明詔乃知聖思

究盡下情然亦怪陛下不知其本而憂其末也人之能
否實有本性雖臣亦以為朝臣不盡稱職也明主之用
人也使能者不敢遺其力而不能者不得處非其任選
舉非其人未必為有罪也舉朝共容非其人乃為怪耳
陛下知其不盡力也而代之憂其職知其不能也而教
之治其事豈徒主勞而臣逸哉雖聖賢並世終不能以
此為治也陛下又患臺閣禁令之不密人事請屬之不
絕聽伊尹作迎客出入之制選司徒更惡吏以守寺門

威禁繇之實未得為禁之本也昔漢安帝時少府竇嘉
辟廷尉郭躬無罪之兄子猶見舉奏章劾紛紛近司隸
校尉孔羨辟大將軍狂悖之弟

名通司馬
宣王弟

而有司默爾

望風希指甚於受屬選舉不以實人事之大者也嘉有
親戚之寵躬非社稷重臣猶尚如此以今況古陛下自
不督必行之罰以絕阿黨之原耳伊尹之制與惡吏守
門非治世之具也使臣之言少蒙察納何患於姦不削
滅而養若昭等乎夫糾擿姦宄忠事也然而世憎小人

行之者以其不顧道理而苟求容進也若陛下不復考其終始必以違衆忤世為奉公密行白人為盡節焉有通人大才而更不能為此耶誠顧道理而弗為耳使天下皆背道而趨利則人主之所最病者陛下將何樂焉胡不絕其萌乎夫先意承旨以求容美率皆天下淺薄無行義者其意務在於適人主之心而已非欲治天下安百姓也陛下何不試變業而示之彼豈執其所守以違聖意哉夫人臣得人主之心安業也處尊顯之官榮

事也食千鍾之祿厚寔也人臣雖愚未有不樂此而喜於迂者也迫於道自彊耳誠以為陛下當憐而佑之少委任焉如何反錄昭等傾側之意而忽若人者乎今者外有伺隙之寇內有貧曠之民陛下當大計天下之損益政事之得失誠不可以怠也

程曉

曉字李明東阿人汝南太守

白罷校事疏

嘉平中曉為黃門侍郎時校事放橫曉上疏

周禮曰設官分職以為民極春秋傳曰天有十日人有

十等

昭七年傳

愚不得臨賢賤不得臨貴於是並建聖哲樹

之風聲明試以功九載考績各修厥業思不出位故樂

書欲拯晉侯其子不聽

左傳成十六年晉厲公陷於淖樂書將載晉侯鍼曰書退國有

大任焉死人橫於街路邴吉不聞

漢書吉嘗逢羣鬪者死傷橫道過之不問

曰宰相不親小事

上不責非職之功下不務分外之賞吏無兼

統之勢民無二事之後斯誠為國要道治亂所繇也遠

覽典志近觀秦漢雖官名改易職司不同至於崇上抑

下顯分明例其致一也初無校事之官干與庶政者也

昔武皇帝大業草創衆官未備而軍旅勤苦民心不安
乃有小罪不可不察故置校事取其一切耳然檢御有
方不至縱恣也此霸世之權宜非帝王之正典其後漸
蒙見任復為疾病轉相因仍莫正其本遂令上察宮廟
下攝衆司官無局業職無分限隨意任情唯心所適法
造於筆端不依科詔獄成於門下不顧覆訊其選官屬
以謹慎為粗疏以諛詞為賢能

諛詞急
遽也

其治事以刻暴

為公嚴以循理為怯弱外則託天威以為聲勢內則聚

羣奸以為腹心大臣恥與分勢含忍而不言小人畏其

鋒芒鬱結而無告至使尹模公於目下肆其奸慝

尹模校事

官罪惡之著行路皆知纖惡之過積年不聞既非周禮

設官之意又非春秋十等之義也今外有公卿將校總

統諸署內有侍中尚書綜理萬機司隸校尉督察京輦

御史中丞董攝宮殿皆高選賢才以充其職申明科詔

以督其違若此諸賢猶不足任校事小吏益不可信若

此諸賢各思盡忠校事區區亦復無益若更高選國士

以為校事則是中丞司隸重增一官耳若如舊選尹模之奸今復發矣進退推算無所用之昔桑弘羊為漢求利卜式以為獨烹弘羊天乃可雨

史記桑弘羊請置均輸鹽鐵官又請更得

入粟補官會旱卜式言曰烹弘羊乃雨

若使政治得失必感天地臣恐水

旱之災未必非校事之繇也曹恭公遠君子近小人國風託以為刺衛獻公舍大臣與小臣謀定姜謂之有罪左傳襄十四年衛獻公出奔齊使祝宗告亡且縱令校告無罪定姜曰有罪若何告無定姜獻公適母縱令校事有益於國以禮義言之尚傷大臣之心况奸回暴露

而復不罷是袞闕不補迷而不返也

疏上遂罷校事官

夏侯太初

沛國譙人為太常司馬懿剪除異己夷三族

官才議

太傅司馬懿問以時事太初議

夫官才用人國之柄也故銓衡專於臺閣上之分也孝行存乎閭巷優劣任之鄉人下之敘也夫欲清教審選在明其分敘不使相涉而已何者上過其分則恐所錄之不本而干勢馳驚之路開下踰其序則恐天爵之外通而機權之門多矣夫天爵下通是庶人議柄也機權

多門是紛亂之原也自州郡中正品度官才以來有年

載矣

魏文帝時陳羣立九品官人之法置中正以定其選以州郡之賢者為之有言行修者或以五升四

以六升五道義虧則或自五退六自六退七

緬緬紛紛未聞整齊豈非分敘

參錯各失其要之所繇哉若令中正但考行倫輩倫輩

當行均斯可官矣何者夫孝行著於家門豈不忠恪於

在官乎仁恕稱於九族豈不達於為政乎義斷行於鄉

黨豈不堪於事任乎三者之類取於中正雖不處其官

名斯任官可知矣行有大小比有高下則所任之流亦

煥然明別矣奚必使中正干銓衡之機於下而執機柄者有所委仗於上上下下交侵以生紛錯哉且臺閣臨下考功校否衆職之屬各有官長旦夕相考莫究於此閭閻之議以意裁處而使匠宰失位衆人驅駭欲風俗清靜其可得乎天臺縣遠衆所絕意所得至者更在側近孰不修飾以要所求所求有路則修已家門者已不如自達於鄉黨矣自達鄉黨者已不如自求之於州邦矣苟開之有路而患其飾真離本雖復嚴責中正督以刑

罰猶無益也豈若使各帥其分官長則各以其屬能否
獻之臺閣臺閣則據官長能否之第參以鄉閭德行之
次擬其倫比勿使偏頗中正則唯考其行迹別其高下
審定輩類勿使升降臺閣總之如其所簡或有參錯則
其責負自在有司官長所第中正輩擬比隨次率而用
之如其不稱責負在外然則內外相參得失有所互相
形檢孰能相飾斯則人心定而事理得庶可以靜風俗
而審官才矣

除重官議

古之建官所以濟育羣生統理民物也故為之君長以
司牧之司牧之主欲一而專一則官任定而上下安專
則職業修而事不煩夫事簡業修上下相安而不治者
未之有也先王建萬國雖其詳未可得而究然分疆畫
界各守土境則非重累羈絆之體也下考殷周五等之
敘徒有小大貴賤之差亦無君官臣民而有二統互相
牽制者也夫官統不一則職業不修職業不修則事何

得而簡事之不簡則民何得而靜民之不靜則邪惡並興而姦偽滋長矣先王達其如此故專其職司而一其統業始自秦世不師聖道私以御職姦以待下懼宰官之不修立監牧以董之畏督監之容曲設司察以糾之宰牧相累監察相司人懷異心上下殊務漢承其緒莫能匡改魏室之隆日不暇及五等之典雖難卒復可麤立儀準以一治制今之長吏皆君吏民橫重以郡守累以刺史若郡所攝唯在大較則與州同無為再重宜省郡

守但任刺史刺史職存則監察不廢郡吏萬數還親農業以省煩費豐財殖穀一也大縣之才皆堪郡守是非之訟每生意異順從則安直已則爭夫和羹之美在於合異上下之益在能相濟順從乃安此琴瑟一聲也蕩而除之則官省事簡二也又幹郡之吏職監諸縣營護黨親鄉邑舊故如有不副而因公掣頓民之困弊咎生於此若皆并合則亂原自塞三也今承衰弊民人彫落賢才鮮少任事者寡郡縣良吏往往非一郡受縣成其

劇在下而吏之上選郡當先足此為親民之吏專得底下吏者民命而常頑鄙令如并之吏多選清良者造職大化宣流民物獲寧四也制使萬戶之縣名之郡守五千以上名之都尉千戶以下令長如故自長以上考課選用轉以能升所牧亦增此進才効功之敘也若經制一定則官才有次治功齊明五也若省郡守縣皆徑達事不擁隔官無留滯三代之風雖未可必簡一之化庶幾可便民省費在於此矣

改服制議

文質之更用猶四時之迭興也王者體天理物必因弊而濟通之時彌質則文之以禮時泰侈則救之以質今承百王之末秦漢餘流世俗彌文宜大改之以易民望今科制自公列侯以下位從大將軍以上皆得服綾錦羅綺紈素金銀飾鏤之物自是以下雜綵之服通於賤人雖上下等級各示有差然朝臣之制已得侔至尊矣玄黃之采已得通於下矣欲使市不鬻華麗之色商不

通難得之貨工不作雕刻之物不可得也是故宜大理
其本準度古法文質之宜取其中則以為禮度車輿服
章皆從質樸禁除末俗華麗之事使幹朝之家有位之
室不復有錦綺之飾無兼采之服纖巧之物自上以下
至於樸素之差示有等級而已勿使過一二之覺若夫
功德之賜上恩所特加皆表之有司然後服用之夫上
之化下猶風之靡草樸素之教興於本朝則彌侈之心
自消於下矣

懿報書曰審官擇人除重官改服制皆大
善禮鄉閭本行朝廷考事大指如所示而

中間一相承習卒不能改秦時無刺史但有郡守長吏
漢家雖有刺史率六條而已故刺史稱傳車其吏古從
事居無常治吏不成臣其後轉更為官司耳昔賈誼亦
患服制漢文雖身服天子綈猶不能使上下如意恐此三
事當待賢能然後了耳太初又書曰漢文雖身衣弋綈
而不革正法度內外有僭擬之服寵臣受無限之賜由
是觀之似指立在身之名非爲齊治制之意也今公侯
命世作宰追蹤上古將隆至治抑末正本若制定於上
則化行於衆矣夫當宜改之時留殷勤之心令發之日
下之應也猶響尋聲耳猶垂諫諍曰待賢能此伊周不
正殷姬之典也竊未喻焉

御選古文淵鑒卷二十一

御選古文淵鑒卷二十二目錄

三國

蜀漢昭烈帝

為漢中王上言獻帝

諸葛亮

出師表

後出師表

自表後主

正議

與羣下教

與李豐教

吳大帝

責諸葛瑾等詔

讓孫皎書

景帝

答張布詔

又答張布

駱統

理張溫表

諸葛恪

與丞相陸遜書

上孫奮牋

御選古文淵鑒卷二十二目錄

御選古文淵鑒卷二十二

內閣學士兼禮部侍郎教習庶吉士臣徐乾學等奉

旨編注

三國

蜀漢昭烈帝

諱備字玄德涿郡人漢景帝子中山靖王勝之後獻帝遇害羣臣勸進遂

即位

為漢中王上言獻帝

建安二十四年定漢中諸將上先主為漢中王表於

漢帝遂設壇場讀

奏記先主上言

臣以具臣之才荷上將之任董督三軍奉辭於外不能
掃除寇難靖匡王室久使陛下聖教陵遲六合之內否
而未泰惟憂反側疾如疾首曩者董卓造為亂階自是
之後羣兇縱橫殘剥海內賴陛下聖德威靈人神同應
或忠義奮討或上天降罰暴逆並殪以漸冰消惟獨曹
操久未梟除侵擅國權恣心極亂臣昔與車騎將軍董
承圖謀討操機事不密承見陷害臣播越失據忠義不

果

建安四年董承受帝衣帶密詔當誅曹操先主與同謀會操遣先主邀袁術未發事覺承等伏誅先主據

下

遂得使操窮凶極逆主后戮殺皇子鳩害

建安十九年曹操截

皇后伏氏所生二皇子皆鳩殺之

雖糾合同盟念在奮力懦弱不武歷

年未效常恐殞沒孤負國恩寤寐永歎夕惕若厲令臣

羣寮以為在昔虞書敦叙九族庶明厲翼五帝損益此

道不廢周監二代並建諸姬實賴晉鄭夾輔之福高祖

龍興尊王子弟大啓九國卒斬諸呂以安大宗今操惡

直醜正實繁有徒包藏禍心篡盜已顯既宗室微弱帝

族無位斟酌古式依假權宜上臣大司馬漢中王臣伏
自三省受國厚恩荷任一方陳力未效所獲已過不宜
復忝高位以重罪謗羣寮見逼迫臣以義臣退惟寇賊
不梟國難未已宗廟傾危社稷將墜成臣憂責碎首之
負若應權通變以寧靖聖朝雖赴水火所不得辭敢慮
常宜以防後悔輒順衆議拜受印璽以崇國威仰惟爵
號位高寵厚俯思報效憂深責重驚怖累息如臨于谷
盡力輸誠獎厲六師率齊羣義應天順時撲討凶逆以

寧社稷以報萬分謹拜章因驛上還所假左將軍宜城亭侯印綬

諸葛亮

字孔明瑯琊人躬耕隴畝自比管仲樂毅徐庶謂先主曰孔明卧龍也將軍宜往顧

之由是詣亮三往乃見先主即位為丞相建興元年封武鄉侯

出師表

建興五年丞相亮出屯漢中以圖中原臨發上疏

先帝創業未半而中道崩殂

建安十九年先主定蜀二十四年有漢中二十六年

即位為章武元年三年殂於永安宮

今天下三分益州疲弊此誠危急存

亡之秋也然侍衛之臣不懈於內忠志之士忘身於外

者蓋追先帝之殊遇欲報之於陛下也誠宜開張聖聽以光先帝遺德恢弘志士之氣不宜妄自菲薄引喻失義以塞忠諫之路也宮中府中俱為一體陟罰臧否不宜異同若有作奸犯科及為忠善者宜付有司論其刑賞以昭陛下平明之理不宜偏私使內外異法也侍中侍郎郭攸之費禕董允等

郭攸之南陽人以器業知名費禕江夏人與攸之同為侍

中董允南郡人黃門侍郎

此皆良實志慮忠純是以先帝簡拔以遺

陛下

先主立太子禕與允俱為舍人

愚以為宮中之事事無大小悉以

容之然後施行必能裨補闕漏有所廣益將軍向寵性

行淑均曉暢軍事試用於昔日先帝稱之曰能

先主時寵為牙

將裨歸之敗寵營獨完

是以衆議舉寵為督

寵時為中部督典宿衛兵

愚以為

營中之事悉以容之必能使行陣和睦優劣得所親賢

臣遠小人此先漢所以興隆也親小人遠賢臣此後漢

所以傾頽也先帝在時每與臣論此事未嘗不歎息痛

恨於桓靈也侍中尚書長史叅軍此悉貞良死節之臣

侍中郭攸之等也陳震傳建興三年拜尚書遷尚書令張裔傳亮駐漢中裔領留府長史蔣琬傳琬遷叅軍與

長史張裔留統府事

願陛下親之信之則漢室之隆可計日而待

也臣本布衣躬耕於南陽苟全性命於亂世不求聞達於諸侯先帝不以臣卑鄙猥自枉屈三顧臣於草廬之中諮臣以當世之事繇是感激遂許先帝以驅馳後值傾覆受任於敗軍之際奉命於危難之間

建安十二年先主敗于當

陽走至夏口達亮求救於孫權

爾來二十有一年矣先帝知臣謹慎故

臨崩寄臣以大事也

先主病篤托孤于丞相亮

受命以來夙夜憂歎

恐託付不效以傷先帝之明故五月渡瀘深入不毛

瀘水

名建興三年亮南征孟獲七縱七禽

今南方已定兵甲已足當獎率三軍

北定中原庶竭駑鈍攘除姦凶興復漢室還於舊都

舊都

洛陽此臣所以報先帝而忠陛下之職分也至於斟酌損

益進盡忠言則攸之禕允之任也願陛下託臣以討賊

興復之效不效則治臣之罪以告先帝之靈若無興德

之言責攸之禕允等之慢以彰其咎陛下亦宜自謀以

諮諏善道察納雅言深追先帝遺詔

先主遺詔勅後主曰勉之勉之勿以

惡小而為之勿以善小而

臣不勝受恩感激今當遠離

臨表涕零不知所言

六年春亮身率諸軍攻祁山南安天水安定三郡叛魏應亮關中響

震會馬謖敗于街亭遂還漢中

後出師表

建興六年冬亮復出散關

先帝慮漢賊不兩立王業不偏安故託臣以討賊也以先帝之明量臣之才故知臣伐賊才弱敵強也然不伐賊王業亦亡惟坐而待亡孰與伐之是故託臣而弗疑也臣受命之日寢不安席食不甘味思惟北征宜先入南故五月渡瀘深入不毛并日而食臣非不自惜也顧

王業不可得偏全於蜀都故冒危難以奉先帝之遺意

也而議者謂為非計今賊適疲於西又務于東

討亭之敗亮拔

西縣千餘家還漢中是年九月曹休與吳將陸遜戰于石亭敗績

兵法乘勞此進趨之

時也謹陳其事如左高帝明並日月謀臣淵深然涉險

被創

高祖漢四年項羽伏弩射漢王傷胸

危然後安今陛下未及高帝謀

臣不如良平而欲以長計取勝坐定天下此臣之未解

一也劉繇王朗各據州郡論安言計動引聖人羣疑滿

腹衆難塞胸今歲不戰明年不征使孫策坐大遂并江

東此臣之未解二也

劉繇為揚州刺史屯曲阿孫策渡江繇棄軍走丹徒王朗為會稽太

守與策戰軍敗詣策

曹操智計殊絕於人其用兵也髣髴孫吳然

困於南陽險於烏巢危於祁連偏於黎陽幾敗北山殆

死潼關然後偽定一時耳

建安二年操征宛為流矢所中按宛屬南陽郡五年袁紹

引兵至黎陽輜重屯烏巢操襲之紹遣兵攻操營二十四年征漢中運米北山下為蜀將趙雲所敗十六年操自潼關渡河馬超掩至天下如雨况臣才弱而欲以不危而定之此臣

之未解三也曹操五攻昌霸不下四越巢湖不成任用

李服而李服圖之委夏侯而夏侯敗亡先帝每稱操為

能猶有此失

巢湖在居巢十四年探軍自渦入淮出肥水十八年進軍濡須口十九年至合肥二

十二年軍居巢二十四年黃忠擊新夏侯淵于定軍山

况臣驚下何能必勝此臣

之未解四也自臣到漢中中間期年耳然喪趙雲陽羣

馬玉閭芝丁立白壽劉郃鄧銅等及曲長屯將七十餘

人突將無前實叟青羌

實料冬翻

散騎武騎一千餘人此皆

數十年之內所糾合四方之精銳非一州之所有若復
數年則損三分之二也當何以圖敵此臣之未解五也
令民窮兵疲而事不可息事不可息則住與行勞費正

等而不及今圖之欲以一州之地與賊持久此臣之未
解六也夫難平者事也昔先帝敗軍於楚當此時曹操
拊手謂天下已定然後先帝東連吳越西取巴蜀舉兵
北征夏侯授首此操之失計而漢事將成也然後吳更
違盟關羽毀敗秭歸蹉跌曹丕稱帝

二十四年孫權襲殺關羽取荊州明

年曹丕稱帝章武二年先主自秭歸進軍為陸遜所敗

凡事如是難可逆見臣鞠躬盡力死而後已至於成敗利鈍非臣之明所能逆覩

也

亮出散關圍陳倉以糧盡引還斬魏將王雙

自表後主

伏念臣賦性拙直遭時艱難興師北伐未獲全功何期
病在膏肓命垂旦夕伏願陛下清心寡慾約已愛民達
孝道于先君存仁心于寰宇提拔隱逸以進賢良屏黜
奸讒以厚風俗臣家成都有桑八百株薄田十五頃子
孫衣食自有餘饒臣身在外別無調度隨時衣食悉仰
于官不別治生以長尺寸臣死之日不使內有餘帛外
有盈財以負陛下也

亮卒如其所言

正議

建興元年魏司徒華歆司空王朗尚書令陳羣太史令許芝謁者僕射諸葛璋各有

書與亮陳天命人事欲使舉

國稱藩亮不報書作正議

昔在項羽起不由德雖處華夏秉帝者之勢卒就湯鑊
為後永戒魏不審鑒今次之矣免身為幸戒在子孫而
二三子各以耆艾之齒承偽指而進書有若崇竦稱莽
之功陳崇張竦上書頌莽功德亦將徧於元禍苟免者邪昔世祖之
創迹舊基奮羸卒數千摧莽彊旅四十餘萬於昆陽之
郊夫據道討淫不在衆寡及至孟德以其譎勝之力舉

數十萬之師救張郃于陽平勢窮慮悔僅能自脫辱其

鋒銳之衆遂喪漢中之地

蜀志先主次陽平與郃等相拒曹公自長安南征先主斂

衆拒險曹公引還先主遂有漢中

深知神器不可妄獲旋還未至感毒

而死子桓淫逸繼之以篡縱使二三子多逞蘇張詭靡之說奉進驩兜滔天之辭欲以誣毀唐帝諷解禹稷所謂徒喪文藻煩勞翰墨者矣夫大人君子之所不為也又軍誠曰萬人必死橫行天下昔軒轅氏整卒數萬制四方定海內况以數十萬之衆據道而臨有罪可得干

擬者哉

與羣下教

夫參署者集衆思廣忠益也若遠小嫌難相違覆曠闕損矣違覆而得中猶棄弊躋而獲珠玉然人心苦不能盡惟徐元直處茲不惑

徐庶字元直與亮獨相善

又董幼宰參署七

年事有不至至于十反來相啓告

董和字幼宰與亮並署左將軍大司馬府

事獻可替否共為歡交

苟能慕元直之十一幼宰之殷勤有忠於

國則亮可少過矣

與李豐教

建興八年亮廢李平為民
徙梓潼郡又與平子豐教

吾與君父子戮力以獎漢室此神明所聞非但人知之

也表都護典漢中委君于東關者不與人議也

李嚴傳
八年亮

命嚴赴漢中表嚴子豐為江州都督典嚴後事亮
以明年出軍命嚴以中都護署府事嚴即平也

謂至

心感動終始可保何獨中乖乎昔楚卿屢紕亦乃克復
思道則福應自然之數也願寬慰都護勤追前闕今雖
解任形業失故奴婢賓客百數十人君以中郎叅軍居
府方之氣類猶為上家若都護思負一意君與公琰推

心從事者

公琰字琬字時琬統留府事

否可復通逝可復還也詳思

斯戒明吾用心臨書長歎涕泣而已

吳大帝

諱權字仲謀兄策被創呼權佩以印綬保據江東後稱尊號

責諸葛瑾等詔

赤烏元年初權信任校事呂壹後壹姦罪發露伏誅權引咎責

躬乃使中書郎袁禮告謝諸大將因問時事所當損益禮還復有詔責數諸葛瑾步騭朱

然呂岱等

袁禮還云與子瑜子山義封定公相見

子瑜瑾字子山騭字義封然字

定公岱字並以時事當有所先後各自以不掌民事不肯便

有所陳悉推之伯言承明

伯言陸遜字承明潘潛字

伯言承明見禮

泣涕懇惻辭旨辛苦乃至懷執危怖有不自安之心聞此悵然深自刻怪何者夫惟聖人能無過行明者能自見耳人之舉措何能悉中獨當已有以傷拒衆意忽不自覺故諸君有嫌難耳不爾何緣乃至于此乎自孤興軍五十年所役賦凡百皆出于民天下未定孽類猶存士民勤苦誠所貫知然勞百姓事不得已耳與諸君從事自少至長髮有二色以為表裏足以明露公私分計

足用相保盡言直諫所望諸君拾遺補闕孤亦望之昔
衛武公年過志壯勤求輔弼每獨歎責且布衣韋帶相
與交結分成好合尚污垢不異今日諸君與孤從事雖
君臣義存猶謂骨肉不復是過榮福喜戚相與共之忠
不匿情智無遺計事統是非諸君豈得從容而已哉同
船濟水將誰與易齊桓諸侯之霸者耳有善管子未嘗
不歎有過未嘗不諫諫而不得終諫不止今孤自省無
桓公之德而諸君諫諍未出于口仍執嫌難以此言之

孤於齊桓良優未知諸君於管子何如耳久不相見因
事當笑共定大業整齊天下當復有誰凡百事要所當
損益樂聞異計匡所不逮

步騭傳中書呂壹典校多所
糾舉騭上疏曰伏聞諸典校

撻挾細微吹毛求瑕重案深誣趙欲陷人以成威福無
罪無辜橫受大刑是以使民踴天踏地誰不戰慄昔之
獄官惟賢是任故皋陶作士呂侯贖刑張于廷尉民無
冤枉休泰之祚實由此興今之小臣動與古異獄以賄
成輕忽人命歸咎于上為國速怨夫一人吁嗟王道為
虧甚可仇疾明德慎罰哲人惟刑書傳所美自今蔽獄
都下則宜諮顧雍武昌則陸遜潘濬平心專意務在得
情隨黨神明受罪何恨權覺悟遂誅呂壹按壹之誅本
因騭

疏

讓孫皎書

字叔朗為孫權護軍校尉嘗以小過與甘寧忿爭權聞之以書讓皎

自吾與北方為敵中間十年初時相持年小今者且三十矣孔子言三十而立非但謂五經也授卿以精兵委卿以大任都護諸將於千里之外欲使如楚任昭奚恤

楚相昭魚

揚威於北境非徒相使逞私志而已近聞卿與甘

興霸飲

興霸甘寧字

因酒發作侵陵其人其人求屬呂蒙督

中此人雖麤豪有不如人意時然其較略大丈夫也吾親之者非私之也吾親愛之卿疎憎之卿所為每與吾

違其可久乎夫居敬而行簡可以臨民愛人多容可以
得衆二者尚不能知安可董督在遠禦寇濟難乎卿行
長大特受重任上有遠方瞻望之視下有部曲朝夕從
事何可恣意有盛怒邪人誰無過貴其能改宜追前愆
深自咎責今故煩諸葛子瑜重宣吾意臨書摧愴心悲

淚下

破得書上疏陳
謝遂與寧結厚

景帝

諱休字子烈大帝子會稽王
亮之兄孫琳廢亮迎休立之

答張布詔

永安三年休與博士祭酒韋曜博士
盛冲講論道藝曜冲素切直左將軍

張布恐發其陰失令已不得
專因飾說拒遏之休答詔

孤之涉學羣書略徧所見不少也其明君闇主奸臣賊
子古今賢愚成敗之事無不覽也今曜等入但欲與論
講書耳不為從曜等始更受學也縱復如此亦何所損
君特當以曜等恐道臣下奸變之事以此不欲令入耳
如此之事孤已自備之不須曜等然後乃解也此都無
所損君意特有所忌故耳

又答張布

布得詔陳謝言懼
妨政事休復答

書籍之事患人不好好之無傷也此無所為非而君以
為不宜是以孤有所及耳王務學業其流各異不相妨
也不圖君今日在事更行此於孤也良所不取

駱統

字公緒會稽烏傷人也孫權時為建忠郎將封親陽亭侯

理張溫表

溫為孫權輔義中郎將使蜀還稱美蜀政權既銜之又嫌其聲名太盛思

有以中傷之會選曹豎艷事起權罪其宿與往還斥還本郡故統上表

伏惟殿下天生明德神啓聖心招髦秀於四方置俊乂
於宮朝多士既受普篤之恩張溫又蒙最隆之施而溫

自招罪譴孤負榮遇念其如此誠可悲疚然臣周旋之

間為國觀聽深知其狀故密陳其理溫實心無他情事

無逆迹但年紀尚少鎮重尚淺而戴赫烈之寵體卓偉

之才亢臧否之譚効褒貶之議於是務執者妒其寵爭

名者嫉其才玄默者非其譚瑕釁者諱其議此臣下所

當詳辨明朝所當究察也昔賈誼至忠之臣也漢文大

明之君也然而絳灌一言賈誼遠退

天子議以誼任公卿之位絳侯周勃

灌嬰之屬毀誼曰雒陽之人年少初學專欲擅權紛亂諸事於是帝亦疎之不用其議

何者疾之

者深譖之者巧也然而誤聞於天下失彰於後世故孔

子曰為君難為臣不易也溫雖智非從橫武非虓虎

虎自

怒曰虓常武之詩曰闕如虓虎

然其弘雅之素英秀之德文章之采論

議之辨卓犖冠羣煒燁曜世世人未有及之者也故論

溫才即可惜言罪則可恕若忍威烈以赦盛德宥賢才

以敦大業固明朝之休光四方之麗觀也國家之於暨

音豔不內之忌族

為國家所忌之族也

猶等之平民是故先見用

於朱治次見舉於衆人中見任於明朝亦見交於溫也

君臣之義義之最重朋友之交交之最輕者也國家不嫌與豔為最重之義是以溫亦不嫌與豔為最輕之交也

豔生事自殺溫宿與豔數交書疏孫權因罪溫幽之有司

時世寵之於上溫竊親

之于下也夫宿惡之民放逸山險則為勁寇將置平土則為健兵故溫念在欲取宿惡以除勁寇之害而增健兵之銳也但自錯落功不副言然計其送兵以此許晏數之多少溫不減之用之強羸溫不下之至于遲速溫不後之故得及秋冬之月赴有警之期不敢忘恩而遺

力也溫之到蜀共譽殷禮雖臣無境外之交亦有可原也境外之交謂無君命而私相從非國事而陰相聞者也若以命行既修君好因叙已情亦使臣之道也故孔子使隣國則有私覲之禮季子聘諸夏亦有燕譚之義也

也

襄公二十九年吳公子札來聘見叔孫穆子說之聘于齊說晏平仲聘于鄭見子產如舊相識適衛說蒧

瑗適晉說趙文子韓宣子魏獻子及叔向

古人有言欲知其君觀其所使見

其下之明明知其上之赫赫溫若譽禮能使彼歎之誠所以昭我臣之多良明使之得其人顯國美于異境揚

君命于他邦是以晉趙文子之盟于宋也稱隨會于屈

建

襄二十七年夏叔孫豹會晉趙武楚屈建于宋子木問于趙孟曰范武子之德何如對曰夫子之家事治

言于晉國無隱情其祝史陳信于鬼神無媿辭子木即屈建范武子即隨會也

王孫圉之使于

晉也譽左史于趙鞅

王孫圉聘于晉趙簡子問曰楚之白珩猶在乎對曰然簡子曰其為

寶也幾何矣曰未嘗為寶楚之所寶者曰觀射父又有左史倚相能道訓典以叙百物

亦向他國

之輔而歎本邦之臣經傳美之以光國而不譏之以外交也王靖內不憂時外不趨事溫彈之不公推之不假于是與靖遂為大怨此其盡節之明驗也靖兵衆之勢

幹任之用皆勝于賈原蔣康溫尚不容私以安于靖豈
敢賣恩以協原康邪又原在職不勤當事不堪溫數對
以醜色彈以急聲若其誠欲賣恩作亂則亦不必貪原
也凡此數者校之于事既不合參之于衆亦不驗臣竊
念人君雖有聖哲之姿非常之智然以一人之身御兆
民之衆從層宮之內瞰四國之外照羣下之情求萬機
之理猶未易周也固當聽察羣下之言以廣聰明之烈
今者人非溫既殷勤臣是溫又契濶辭則俱巧意則俱

至各自言欲為國誰其言欲為私倉卒之間猶難即別
然以殿下之聰叡察講論之曲直若潛神留思纖粗研
核情何嫌而不宣事何昧而不昭哉溫非親臣臣非愛
溫者也昔之君子皆抑私忿以增君明彼獨行之于前
臣恥廢之于後故遂發宿懷於今日納愚言于聖聽實
盡心于明朝非有念于溫身也

權終不納

諸葛恪

字元遜瑾長子歷太傅加
荊揚州牧為孫峻構殺

與丞相陸遜書

赤烏六年拜恪威北將軍屯柴
桑與丞相遜書恪知遜以此嫌

已故遂廣其
理而贊其指

楊敬叔傳述清論以為方今人物彫盡守德業者不能
復幾宜相左右更為輔車上熙國事下相珍惜又疾世
俗好相謗毀使已成之器中有損累將進之徒意不歡
笑聞此喟然誠獨擊節愚以為君子不求備於一人自
孔氏門徒大數三千其見異者七十二人至於子張子
路子貢等七十之徒亞聖之德然猶各有所短師辟由
喭賜不受命豈況下此而無所闕且仲尼不以數子之

不備而引以為友不以人所短棄其所長也加以當今
取士宜寬於往古何者時務從橫而善人單少國家職
司常苦不克苟令性不邪惡志在陳力便可獎就騁其
所任若於小小宜適私行不足皆宜濶略不足縷責且
士誠不可纖論苛克苛克則彼聖賢猶將不全況其出
入者邪故曰以道望人則難以人望人則易賢愚可知
自漢末以來中國士大夫如許子將輩

許邵字子將汝南人好叢論鄉

黨人所以更相謗訕或至於禍原其本起非為大讐惟

坐克已不能盡如禮而責人專以正義夫已不如禮則
人不服責人以正義則人不堪內不服其行外不堪其
責則不得不相怨相怨一生則小人得容其間得容其
間則三至之言浸潤之譖紛錯交至雖使至明至親者
處之猶難以自定況已為隙且未能明者乎是故張陳
至於血刃蕭朱不終其好本由於此而已

張耳陳餘相與為刎頸交

後二人有隙蕭育以公卿子顯名時朱博為夫
杜陵亭長為育所辱育後與博有隙不能終
夫不舍小

過纖微相責久乃至於家戶為怨一國無復全行之士

也

上孫奮牋

奮封齊王居武昌權亮太傅恪不欲諸王處江濱兵馬之地徙奮豫章奮

不從又數越法度恪

上牋諫奮懼移南昌

帝王之尊與天同位是以家天下臣父兄四海之內皆

為臣妾仇讐有善不得不舉親戚有惡不得不誅所以

承天理物先國後身蓋聖人立制百代不易之道也昔

漢初興多王子弟至於太彊輒為不軌上則幾危社稷

下則骨肉相殘其後懲戒以為大諱自光武以來諸王

有制惟得自娛於宮內不得臨民干與政事其與交通
皆有重禁遂以全安各保福祚此則前世得失之驗也
近袁紹劉表各有國土土地非狹人衆非弱以適庶不
分遂滅其宗祀此乃天下愚智所共嗟歎大行皇帝凡天

子初薨未諡稱
曰大行皇帝

覽古戒今防芽遏萌慮於千載是以寢

疾之日分遣諸王各早就國詔策殷勤科禁嚴峻其所
戒勅無所不至誠欲上安宗廟下全諸王使百世相承
無凶國害家之悔也大王宜上惟太伯順父之志中念

河間獻王

河間獻王名德漢景帝之子修學好古溫仁恭儉

東海王彊

彊本光武之太

子郭后既廢彊辭位願備藩國於是以彊為東海王

恭敬之節下當裁抑驕恣荒

亂以為警戒而聞頃至武昌以來多違詔勅不拘制度擅發諸將兵治護宮室又左右常從有罪過者當以表聞公付有司而擅私殺事不明白大司馬呂岱親受先帝詔勅輔道大王既不承用其言令懷憂怖華錡先帝近臣忠良正直其所陳道當納用之而聞怒錡有收縛之語又中書楊融親受詔勅所當恭肅云正自不聽禁

當如我何聞此之日大小驚怪莫不寒心里語曰明鏡

所以照形古事所以知今大王宜深以魯王為戒

魯王奮兄

也霸改易其行戰戰兢兢盡敬朝廷如此則無求不得若

棄忘先帝法教懷輕慢之心臣下寧負大王不敢負先
帝遺詔寧為大王所怨疾豈敢忘尊主之威而令詔勅
不行於藩臣邪此古今正義大王所照知也夫福來有
由禍來有漸漸生不憂將不可悔向使魯王早納忠直
之言懷驚懼之慮享祚無窮豈有滅亡之禍哉夫良藥

苦口惟疾者能甘之忠言逆耳惟達者能受之今者恪
等悽悽欲為大王除危殆於萌芽廣福慶之基原是以
不自知言至願蒙三思



御選古文淵鑒卷二十二



總校官庶吉士 臣張能照

校對官助教 臣胡予襄

謄錄舉人 臣吳之承